

Läbesluuf Mariette Kohli – Janzi

Üses liebe Mueti isch am 3. Februar 1966 am Abe z'Mannried dehime im Elterehuus ufd Wält cho. Sie isch Tochter vom Hansruedi u dr Erika Janzi-Haldi gsi ud Schwester vom Hansueli, Doris, Daniel u dr Monika.

Z'Mannried isch ging öppis gange, ob bim verusse spilä, im Stall bi de Tier oder o mengisch zangge unterenand. Das kört ja bi Gschwüster o drzue. Z'Mueti isch zwar igtlich immer eher es ruehigs Mitli gsi u es het vil brucht bis si veruckt isch worde.

Im 1973 isch z'Mueti du när z'Mannried igschuelet worde u isch vo den ewäg id Primarschuel gange. Si het mit all ihrne Schuelfründinne ging ä gueti Zit ka u bsunders guet het sis mit em Moor Susi, Eschler Beatrice u dr Matti Margrit ka. Si isch sicher o ging froh gsi das Dänel ir nechi isch gsi. Är isch ja nume es Jahr elter gsi u si his bsunders guet zäme ka. O dr jüngere Schwester Monika isch si ging zur Siite gstande.

Turne isch nid z'Lieblingsfach vom Mueti gsi u das het sich o i dä spetere Jahr nid genderet. Drfür isch äs aber ging gäre z'Bärg, ids Chumi uechi glüfe. So isch äs i dä Summerferie vor dr 9. Klass mit Alpdispens für 10 Wuche im Chumi obe gsi u het dert mit Dänel u Ihrem Grosspapa Ernst cheeset. Si het sich ging gäre a di schöni Zit erinneret.

Am 21. März 1982 isch z'Mueti Konfirmiert worde u nach der Schuel het si ihri Lehr bi Imoberstägs ir Cheeserie als Verchüferin ahgfange. Bi Imoberstägs hets ira ging sehr guet gfallt u si isch nach der Lehr als Cheesspezialitäre Verchüferin bis im 1986 no dert blibä.

Wo z'Mueti im 1986 alles buechet het ka für uf Amerika het si ihrne Eltere gsiht das sie ids fürnes Halbsjahr uf Amerika als Au Pair göngi ga wärche. Da sie geng eher Hiimweh het ka, hi aller gmint das sigi nume ä Witz. Aber du isch si vom 14. April 1986 bis am 13. Oktober 1986 uf New York u het dert jehrigi Zwillingमितleni ghüetet u zu dene guggt. Wo si wider mitem Flüger isch hiime cho isch di ganzi Familie ussert ihre Papa si uf Zürich ga riche.

Wo äs wider dehimä isch gsi, het z'Mueti für ungefähr 3 Mönet gholfä buurä u isch mischtens id Chessle ga stalle. Si het scho ging früüd ka a dä Tier u si isch o ging die gsi wo Büseni u Meersüwleni uf Mannried bracht het.

Ab em Winter 1987 het z'Mueti im Migros Zwüsimme ahgfange u het dert ono d'Summersaison gmacht.

Am 15. Ugschte 1987 het z'Mueti üsa Papa dr André Kohli kenneglehrt u het sich verliebt. Äs isch när bi dene zwü zimlich rassig gange u si schnäll zäme cho. U si het im Winter 1987/88 o scho di erschti Saison ir Chemistube gwärchet.

Am 2. Juli 1988 hi z'Mueti u Papa ir Chilche St. Stephan ghürate u äs paar Mönet speter isch am 1. Dezember 1988 dr Patrick ufd Wält cho. Am 10. Januar 1992 isch dr Dani ufd Wält cho. Da der Dani chli z'früei gebore isch, het är mitem Heli uf Bärn müesse gfloge wärde u dert i Bruetchaschte müesse. Zum Glück het är bald wider hiime dörfe. Am 24. Juli 1993 isch üsne Eltere no d'Sarah gschenkt worde u so isch üsi jungi Familie komplett gsi.

Z'Mueti het sich immer liebevoll um üs kümmeret u äs het guggt dases üs a nüt fehlt. Mier hi ä wundervolli Chindhiit dörfe erläbe u mier hi gspürt das bim Mueti d'Familie ging zersch chunnt.

Im Frühlig 1997 si mier alli zämä i Lengebrand uehi züglet u d'Eltere hi när im 2000 d'Chemistube vo üsne Grosseeltere Alfred u dr Margrit Kohli-Reimann übernoh.

Üser Eltere hi d'Chemistube witerentwicklet u dr Betrib witergfuehrt mit huufe Gescht vo aller Wält. Z'Mueti het ging gäre im Restourant gwärchet u äs hets gschaftt üs Chind, z'Restourant u o alles drum u dra undr i Huet z'bringe.

Näbscht dä lenge Arbeitstäg hi üser Eltere sich aber o ging Zit gnoh für mit üs ä schöne Usflug z'mache oder o we z'Restourant im Früehlig u Herbscht isch zue gsi, sisi mit üs id Ferie. Di wunderschöne Huusbootferie z'Irland u Frankrich bhalte mier alli i gueter Erinnerig.

Nach däm das mier Chind vo dehim si uszoge si z'Mueti u Papa ging gäre uf Gran Canaria u da z'Mueti ging gärä sehr suber het ka, so het sy mischtens ono gad e igeta Chüssibezug mit id Ferie gno. Dert hi si sich chönne erhole u hi wider chönne Energie tanke für di nechsti Summer- oder Wintersaison.

Im November 2019 isch leider bim Mueti e böartige Tumor entdeckt worde u das isch natürlich für di ganzi Familie ä Schock gsi. Z'Mueti het dr Kampf gäge di Chrankhiit agnoh u het das miteme operative Igriff u Chemotherapie probiert. I dere schwirige u chraftruubende Zit het äs am 26. September 2020 ar Hochzit vor Sarah dörfe drbi si u när am 13. Juli 2021 isch ihres erschte Grosschind ufd Wält cho u das chline Miteli het si scho grad äs paar Tag speter dörfe id Arme schliesse. Ä Monet speter am 14. Ugschte 2021 het si ono ar Hochzit vo ihrem erschtgeborne, Patrick dörfe drbi si.

Für üses Mueti isch das ä sehr schwirige u chraftruubende Zit gsi, abr glich het äs no schöni Momänte chönne erläbe u das hetim o wider Früüd u Läbesmuet gschenkt.

Leider het aber vo dene huufe Chemos kini richtig möge aschlah u u üses Mueti het dr Kampf müesse ufgeh. Viil z'früei hi mier üs vo üsem liebe Mueti müesse verabschiide. Si hinderlat e riise Lücke bi üs allne. Läbe tuet si i üs allne witer u git üs Chraft für dä Wäg wo no chunnt.

Du fehsch üs u mier vermisse dich!